

林文忠公政書

親勘海塘各工片

再太倉州屬之寶山縣捐修海塘工程經

臣會

同督 臣陶澍奏奉

上諭陶澍等奏籌議捐修海塘工程估需銀二十萬兩有零據稱業經率屬倡捐該縣紳士踴躍輸將捐項已經及半其附近之嘉定上海二縣皆唇齒相依尙可互勸集捐以期歲事著卽責成蘇松太道陽金城太倉州知州李正鼎督令各該縣隨捐隨辦竝往稽查無任草率等因欽此當經恭錄轉

行欽遵辦理旋據蘇松太道陽金城太倉州知  
州李正鼎等以該處塘工有迫近海濱外無護  
灘之處應否繞越挽築稟請

臣

臨工勘辦又嘉

定上海二縣雖已分勸盡捐尙未集有成數亦

須

臣

親往督勸

臣

隨於十月二十八日自省起

程前赴寶山工次親加履勘除縣城迤西之小  
沙背迤北之談家浜二處雖皆臨水頂衝而迫  
近城垣市鎮未便過於縮進仍照原估於舊塘  
裏面加築新塘以資重門保障外其江西之衣

周塘及江東之八房宅唐家宅長浜周家宅各處均係頂對大洋形勢挺出外灘已塌塘腳漸卸入海若仍於原處修築現在礙難施工且恐不能經久自應繞越另集庶臻鞏固又江西江東兩礮臺挺峙海口雖潮大之時不免漫及根腳而形勝所在未便改移惟於臨水之一面加築圈堰多護椿石以憑扞衛又施港迤南塘身留有石洞一座因係農民灌溉取需不便令其堵塞但恐大汛潮猛易被沖決亦須略爲挽越

以避激蕩均經

臣

逐加履勘與該道縣並紳董

人等酌商定見卽飭該縣等妥爲照辦毋許稍

有草率至嘉定上海二縣協捐一節竝經

臣親

督道府州縣傳令各該紳士詳加開導互勸輸

將僉稱各官尙且捐廉爲民保障該紳等住居

切近自當勉力輸助以濟要工察其情詞尙屬

踴躍可期源源捐濟無誤工需

臣

仍請飭樽節

動用務使料實工堅以爲一勞永逸之計又查

今歲夏秋之間沿海屢被風潮本不止寶山一

處如華亭縣之海塘亦據該縣稟報外塘椿石  
多被沖損內塘腳土間被汕刷等情經臣彙入  
風潮案內附片奏蒙

聖鑒在案茲

臣

於寶山勘畢之後竝到華亭海塘逐

段查勘該塘內面砌條石十五層外面包土其  
迎潮處所又加椿木碎石層層攔禦潮至雖被  
激齧仍從空隙處退回故相沿謂之玲瓏堪實  
爲全郡保障前於道光十一年遭被風潮損壞

曾經請

帑承修計今已逾保固例限本年六月十四五及七月初二三等日颶風大作致將玲瓏填土石椿木各工先後沖壞潮汐直到塘根刷去面土激動條石當經署松江府周岱齡督同該縣張慶瑗趕緊搶堵一面按段查勘估計詳辦卽據該府縣以工段綿長一時無款可籌而該處民力拮据卽勸捐亦恐無濟祇得由松江府屬各員捐廉酌辦議請先行擇要將珠稱等號有土無石之單塘一百二十餘丈再加木椿一層椿

內填石石後添土鋪築行礮務令堅實又將最險之金山嘴地方鳥官以下等號擇要修築四百四十餘丈均於石塘包土之外量至六丈地位排釘木椿內填碎石加築尾土悉照玲瓏堤做法修成護塘灘坡俾險要之處捍衛有資再將金塘外堤徐圖修復等情臣此次親詣覆勘所估各段皆係刻不容緩之工應如該府縣所議先行興辦已令卽速施工所需經費據該府正署各員督率該屬之華亭奉賢上海南匯青



浦等縣分別捐廉通力合作除俟工竣驗收查  
明實用確數再行專摺具

奏外所有臣出省親勘海塘分別飭辦緣由謹會

同督臣陶澍附片陳明伏祈

聖鑒謹

奏

籌辦通漕要道摺

奏爲籌辦通漕要道將練湖隄埧勸諭民修運河  
開工由官捐辦俾漕運長資利益恭摺奏祈

聖鑒事竊照鎮江爲漕運咽喉江浙兩省糧船皆所  
必出之路而每年重空往返挑浚河道蓄水提  
船一切機宜則惟鎮江道府縣營責成爲重其  
挑河例價不敷竝須江蘇各屬州縣捐資協貼  
一遇江潮低落設法推挽勞費尤倍於平時揆  
其致病之由總因該處運河本係鑿山通道竝

無水原祇恃引江入河以資浮送而江水本不宜過大若運河灌輸盈滿於行舟固爲順利而沿江田地早已被淹如江水落低則利於洲田又不利於漕運兩者相較固係農田爲本而運道則須隨時盡力以圖補救之方臣陶澍於嘉慶二十一年巡視南漕卽以修整閘座濬治練湖等事縷晰陳

奏道光七年九年在巡撫任內復節次

奏明籌辦閘埧提埂以資收蓄誠以江潮長落靡

常緩急仍難盡恃練湖開於晉代在運河之西  
爲長驪諸山衆水所注唐宋元明皆治之以濟  
運其上接丹徒境者謂之上練湖下接丹陽城  
者謂之下練湖上湖高於下湖下湖又高於運  
河以節節傳送有湖水放一寸運河增一尺之  
諺與山東運河之有南旺南陽徽山諸湖情形  
相仿明季湖禁漸弛居民占墾遂致就堙我

朝康熙十九年始定以上練湖改田升科下練湖  
留資蓄水然湮塞已久所蓄究屬無多而濬湖

築隄經費太鉅是以屢議屢寢臣陶澍在巡撫

任內奏修閘座亦係先其所急將黃泥閘移於

張官渡以當湖之下游俾得擊托湖流使之同

漾稍濟江潮之不逮每於重運回空經過閉板

蓄水曾著成效然全湖隄埝久已損壞水來則

直沖而易決水去又一洩而無餘臣林則徐於

道光十二年秋閒親歷履勘因議擇要築埝以

利節宣迨十四年四月臣陶澍閱兵過彼亦經

覆勘意見相同遂卽定議籌辦竝經附片

奏明在案隨飭常緝道李彥章相度機宜在於該湖頂沖之黃金埧及東岡一帶先築兩重蓄水埧加培圩埂二千八百八十丈零使山水皆得入湖不令散漫又恐水勢暴猛或虞沖決因於湖之東隄添建減水石埧兩座如遇暴漲有所分洩可以保隄其通入運河之處勘得有念七家古涵較舊濬之范家溝機勢更順因修復古涵以作水門并就近建設濟運石閘一座於運送軍船時放水接濟漕過之後用土填築留一

涵洞以灌隄外民田是不特濟運有資卽農民

亦咸霑其利臣等當卽飭道督縣勸諭得霑水

利之業佃或出力或出資令其舉董經理官爲

督率輿情感知利益踴躍急公自夏至冬工程

陸續報竣適值是冬丹徒水涸回空全進橫關

臣林則徐親駐鎮江督催提挽飭委該道李彥

章試放濟運新閘由念七家涵引水而出竟能

倒漾上行至數十里之遠連放數次軍船得以

銜尾南行其效頗爲顯著此道光十四年勸諭

民間捐築練湖蓄水減水諸埧暨修復古涵改建濟運閘之情形也復查下游張官渡一閘爲漕船經過要津前將黃泥閘移建該處原以引截練湖便資擊託時經七載固限早逾第年來溜勢時有變遷河形漸形灣曲每遇夏秋盛漲疏洩不及金門難免逼溜卽恐有礙舟行臣等復往返札裔今昔情形既殊自須變通盡利欲其順溜取直莫若因地制宜隨勘得該閘迤上相距二百丈之處溜勢漸形平緩而其地段仍



在練湖濟運關之下游疊經督匠相度僉謂宜將該關移建於此但舊關只有一座金門而舟楫經由絡繹不絕欲議改建尙須另籌行船之路始可截填興工因思移地建關原欲以殺水勢莫若改爲正關越關兩座尤靈遂於所勘改建之地先就南岸一邊開出越河將地勢加倍展寬俾其可容磯心雙孔之關卽於越河圈築攔堤一道仍留靠北一半河路俾得照常行船其在攔堤以內者卽可施工先建越關俟越關

工竣放水通舟然後折去靠南之埧圍於靠北  
一邊以建正閘如此倒換辦理往來船隻既無  
阻滯之虞而雙孔閘成又免涌激之患將來設  
遇修理亦可不礙漕行但一閘改爲兩閘中添  
磯心一道所需工料倍多而經費有常仍不敢  
遽請動

帑查挑辦徒陽運河向由各屬捐資協貼本係歷  
有舊章若果閘座鈐束得宜卽挑費亦可期節  
省是以改建該閘仍歸官捐辦理各州縣中急

公從事者尙不乏人自上年秋間集項購料興工至十二月內先將越閘辦竣工料均稱堅固維時回空南下又值潮枯水涸之時當卽放出湖潴將該閘下板攔蓄愈得倒漾之力江浙回空約三千艘無不由該閘而下更爲濟運之明效旋卽接手砌辦正閘不日亦可告成此自上年至今建改張官渡正越兩閘官捐辦理之情形也惟思張官渡之下游尙須重門收束遇水淺時上下拗板此啟彼閉始能呼吸相通卽練

湖圩埂埧涵雖已擇要勸民修辦而殘缺之處  
尙多仍須設法籌維期湖水多蓄一分卽運河  
多得一分之益查張官渡迤下六十里有呂城  
開建自宋元祐四年其地勢正當扼要我

朝雍正年間就舊基重建正越兩閘嗣是越閘堙  
塞糧船祇由正閘經行嘉慶二十二年曾經估  
修旋又議緩上年該閘金剛牆漸坍到底坍下  
之石堵至金門重運經臨幾爲所阻經丹陽縣  
督率呂城巡檢集夫抬撈始得通舟此時勘估

興修實屬刻不容緩惟該閘越河久爲瓦礫填  
壅越閘石料剝損尤多今旣議興修仍須兩閘  
并辦不便偏廢現照張官渡章程先行挑浚越  
河趕修越閘已於正月興工此時糧船正在北  
行仍令經由正閘俟越閘修竣得以通舟再將  
正閘接手開砌所需經費亦歸本省官捐項下  
撥節辦理概不敢請動款項至練湖隄身單薄  
之處西南兩面尤甚其蓄水舊制本以湖心二  
尺八寸爲度因湖底旣淤隄埂又缺遂致不能

多蓄欲籌東水不外培隄但湖面正寬卽以下湖而言周圍已四十里勢難全行圍築前於湖東一帶酌建蓄水減水各埧並築圩埂二千八百餘丈來源已有歸宿不至旁溢斜分今再勸諭民開於湖之西南兩面就近挑挖湖淤卽以挑出之土培築堤埂照舊制高一丈二尺面寬四尺兩邊二五收分更足以資攔蓄該處近湖民居有一百八十三邨計田四萬六百八十餘畝查歷修水利本有按田出夫業食佃力之章

程茲復由該道李彥章督同鎮江府龔文煥分別出示覆加勸諭農民均各樂從臣等已飭陸續興挑卽令印委各員常川駐工稽查督辦務使逐一核實迅速歲事俾運河長資利益漕事年勝一年以期仰副

聖主利運便民之至意至此案均係捐辦工程應請免其造冊報銷除各工一律全竣分別驗收另行

奏報外所有先後籌辦緣由據署蘇州藩司裕謙

會同常鎮道李彥章具詳前來臣等謹合詞恭  
摺具

奏伏乞

皇上聖鑒謹

奏



會奏道光十年以前積欠銀米麥豆穀石請豁

摺

奏爲遊

旨查明江蘇省積年民欠及因裁緩帶銀米麥豆穀  
石實在未完各數開列清單恭摺具

奏仰祈

聖鑒事竊

臣

等接准部咨欽奉

上諭朕寅承丕緒撫馭萬方旰食宵衣無日不以勤  
恤民依爲念十五年中劭農重穀減賦停徵疊沛

恩綸覃敷愷澤所願四海烝黎家給人足共享昇平之福因思各省民欠錢糧自嘉慶年間蠲免以後迄今又閱十餘年矣比歲以來仰蒙

慈佑慶協綏豐民氣和樂本年恭逢

聖母皇太后六旬萬壽欽惟

慈禧光被歡洽敷天允宜申錫無疆普蠲逋賦所有各省節年正耗民欠錢糧及因裁緩徵帶徵銀穀並借給籽種口糧牛具及漕項蘆課學租雜稅等項卽著該督撫將軍府尹等將道光十年以前實欠

在民者詳悉查明按照該省所屬之某州某縣銀  
穀若干速行開單具奏候朕以次降旨全行豁免  
竝著先將此旨謄黃宣示城鄉邨鎮咸使聞知俾  
官吏胥役無從影射侵欺以期膏澤下究用副朕  
錫羨延

釐普惠寰區至意該部遵諭施行欽此當經恭錄轉行  
江甯蘇州兩藩司及江安蘇松兩糧道欽遵查  
辦一面恭刊謄黃頒發各屬通行曉諭業將辦  
理情形先行覆

奏在案臣等伏查江蘇爲財賦之區錢漕繁重甲於他省上屆查辦嘉慶二十二年以前民欠共銀四百六十九萬二千餘兩米麥豆等項一百六萬六千餘石均奉

恩旨全行豁免今自嘉慶二十三年以後截至道光十年又閱十有餘載其年應征之項歷於奏銷案內比較分數按年造冊

奏咨復將上下兩忙徵解銀數隨時據實

奏報層層考核備極周詳是以應征熟田項下民

欠尙不至於過多惟因裁緩征之項是道光三年大水以後江蘇兩藩司所屬頻年屢有裁傷民生積困之餘既不能概予議蠲自不得不量爲展緩就一年而計爲數尙少合十餘年併計積數遂多此次

曠典特頒總期實惠及民不使官吏有一毫之侵欺款用有一毫之隱混臣等節次飭司將應豁者何年何款不應豁者何年何款頒發各屬遍行示諭務令城鄉市鎮共見共聞在官之人無從

影射凡在茅檐部屋無不歡呼載道感頌

皇仁查十年以前積欠之地丁驛俸項脚屯折貢舫  
蘆課雜稅學租河灘租等款錢糧以及漕糧漕  
項銀米俱在清豁之例款目甚繁其中已入清  
查及參案虧缺續完各數必當逐款剔除不許  
混入而未完民欠尤以版串爲憑故必逐張盤  
驗果係的欠在民者方准查辦惟歷年久遠串  
據紛紜鈎稽大爲不易隨復督飭藩司糧道悉  
心綜核往返駁查竝遴派明幹丞倅及候補州

縣等官分赴各屬會同該管府州弔查各任實徵簿冊交代案據按年按款核對務使針孔相符遞加切結送司核辦其直隸州廳民欠由巡道核盤加轉如有影射朦混責令據實揭參並又節次札催去後茲據江甯布政使楊簧署蘇州布政使裕謙江安督糧道唐鑑蘇松督糧道陶廷杰先後會督各道府州暨委員等查實節年民欠及因裁緩帶銀米各確數開單詳請具奏前來

臣

等覆加查核除太湖金匱嘉定崇明四

廳縣太倉鎮江二衛應徵錢糧均係年清年款  
並無十年以前應豁民欠外計自嘉慶二十二  
年起至道光十年止江甯藩司所屬熟田應徵  
項下實欠地漕等銀六萬六千七百二十八兩  
零穀二千二十三石零蘇州藩司所屬熟田應  
徵項下實欠地漕等銀八萬六千三百九十七  
兩零米一百四十五石零以額徵之數科算其  
所欠尙不及百分之一惟節年因裁緩徵項下  
江甯藩司所屬地丁驛俸項脚屯折貢舫蘆課



雜稅公費學租漕價出借糧種口糧油麻地租  
河灘租竝漕項鳳陽淮安徐州倉正耗及補征  
蘆課各款共銀三百七十二萬七千九百八兩  
零外有阜甯縣新淤灘地未完道光十年地丁  
灘租正耗銀七百五十九兩零南屯恤孤漕糧  
漕項麥豆及出借常平倉穀一百一十六萬六  
千三百三石零蘇州藩司所屬節年裁緩地丁  
項腳蘆課漕項學租等款共銀一百一十二萬  
五百六十八兩零地漕米豆二十二萬九千五

石零均因連年裁歉疊奉

恩旨遞緩本不在應徵之列尙非花戶完納不前亦非州縣催科不力以上江蘇兩屬統共熟田未完銀十五萬三千一百二十六兩零米穀二千一百六十六石因裁遞緩銀四百八十四萬九千二百三十五兩零米豆麥穀一百三十九萬五千三百九十石零皆係實欠在民竝無絲粒隱混除將應豁各款清冊咨部核辦外臣等謹會同漕運總督臣恩特亨額河道總督臣麟慶合

詞恭摺具

奏竝開繕清單敬呈

御覽恭候

恩旨遵行再各屬社倉穀石係民捐民辦所有出借未完各數上屆係於欽奉

恩詔豁免籽種口糧案內聲明歸入年例咨報冊內請豁奉部覆准在案今屆社倉出借應豁穀石另查明確數詳咨仍歸本案報銷冊內造報又各項應免雜款及攤徵河銀容照上屆成案查

明另行分別具

奏其蘇州藩司所屬竝無出借常平倉穀籽種口糧牛具亦無雜稅欠款合并陳明伏乞

皇上聖鑒謹

奏

會奏各州縣墊完民欠銀米請豁摺

奏爲積欠案內查有各州縣歷年墊完民欠銀米  
無從徵還恭懇

天恩一體豁免仰祈

聖鑒事竊照欽奉

恩旨查豁道光十年以前民欠銀米業經臣等督飭  
司道府州等吊核簿串剔除已入清查參案續  
完各款將實欠在民確數另摺開單具

奏恭候

恩旨欽遵外惟盤查銀米版串實有溢於報部欠解之數查係征少解多官爲墊完之項而其中漕米尾欠爲數居多吊齊實徵堂簿以及交代案據逐一核對均屬相符由各府州會同委員層層加結並無捏混計自嘉慶二十三年起至道光十年止除陸續徵完外江藩司屬尙有墊完未徵銀一十七萬七百四十八兩零米二萬四千二百七十一石零蘇藩司屬尙有墊完未徵銀一十六萬一千六百七十一兩零米三十七

萬三千六百八十八石零緣江蘇起運漕糧數  
居南漕之半而漕船開行次序又在各省之前  
例限則緊迫異常糧戶復殷疲不一加以頻遭  
積歉卽嚴刑峻法亦不能於冬春之際責令花  
戶一律全完而

天庾正供不敢遲緩州縣恐悞兌運不得已暫動庫  
項買米交幫其地丁漕項錢糧每年奏銷時畸  
零小戶完納不前亦有官爲挪墊以副例限而  
濟要需遇有交代將墊完銀米流抵挪缺之項

移交後任接征實相沿年久在州縣之動項墊  
解固不免規避處分然當漕務喫緊之時催兌  
催開急如星火實迫於萬不得已卽地漕錢糧  
院司亟待截數奏報不能任其緩解故亦間有  
墊完此等情形久邀

聖明洞鑒但所墊銀米原係實欠在民歷經責令州  
縣陸續徵完歸補庫項本爲有著之款今民間  
逋賦已蒙

恩旨蠲除不能再向糧戶催徵遂致無從歸款查嘉



慶二十三年查辦豁免曾以墊完銀米官非一  
任墊非一年其現在本任者尙可勒限追完而  
事故離省者難免咨追懸宕經前督撫臣奏蒙  
恩旨准由現任分作十年攤補行之一年仍歸於

恩詔款內豁免且上屆查辦之時嘉慶十四年以前  
墊完民欠已於二次清查案內開報僅有十五  
年至二十二年之款爲時不過八載相隔亦止  
一年尙有本任之員可追今道光十五年查豁  
積欠計各屬各墊之款自嘉慶二十三年起至

道光十年止已積十有三載之多現又相距五  
年之久原墊各員均已輾轉更易此內如嘉慶  
二十三四五等年銀米已入三次清查分限催  
納又道光元二三四等年米石先限一年徵完  
繼復請分三年帶征除屢被裁歉各廳州縣欠  
款展緩之外其餘仍照原限催征凡征不足數  
分別追賠皆曾

奏咨有案柰完繳寥寥類多人亡產盡猶冀仍追  
民欠藉以補苴今民欠既無從著追原墊卽無

可彌補而自道光三年大水以後災歉頻仍不  
獨民力拮据而州縣辦公尤形支絀卽令現任  
之員分年攤補恐亦徒託空言茲據江甯藩司  
楊簧署蘇州藩司裕謙詳據江蘇各府州稟請  
將此項墊完民欠銀米各按交代原抵之數一  
體懇免註銷動缺庫項等情先後請

奏前來臣等查此等銀米在小民實欠原應並荷  
恩蠲而州縣墊完早已上供

國用無從徵補合無仰懇

天恩俯念江蘇錢漕重大迥非他省可比墊出因公  
官經屢易今除還過之外所餘尾欠按各年額  
征科算不及百分中之一二所有兩藩司屬墊  
完民欠共銀三十三萬二千四百一十九兩零  
米三十九萬七千九百五十九石零照各屬交  
代原抵之數每石折價三兩上下不等共合銀  
一百一十七萬一千三百四十二兩零伏乞

皇上格外慈施

准予一體豁免註銷各屬存庫則州縣得免攤賠小

民益霑

愷澤而庫項亦歸實在感沐

恩慈倍無涯涘此後根本既清末流可截臣等惟有

督飭藩司道府加意徵儲倍嚴稽核不任稍涉

虛懸庶幾澄源節流仰副

聖主實惠均被之至意謹合詞恭摺具

奏並繕清單敬呈

御覽伏乞

皇上聖鑒訓示謹

奏

會奏各屬墊完民欠銀米情形片

再江蘇錢漕之重款項之繁終歲催提幾無虛日各屬咸知考成所係無不加意催科但一州縣中大者數十萬戶小亦十餘萬戶其一戶之中又將田畝糧額私自分析粉碎畸零莫可勝數有田在此圖而糧由別處完納令人難以尋覓者謂之寄莊有墳墓住房本係有糧之地因無可耕種永遠拖欠者謂之板荒又有私將田畝出售並不推收過戶而逃亡無蹤者謂之虛

糧此等錢漕皆不得不由官墊解然錢糧尚有  
奏銷分數卽未經全解猶許照例開參而漕米  
照糧船起運之時顆粒不能短少限期緊迫

功令森嚴臣等不敢不極力催提州縣卽不得不

買米墊兌且不獨墊米而已凡重運之自南而  
北與回空之自北而南除例給各款之外無非  
取諸州縣卽例給之款亦須州縣將漕項銀兩  
趕緊解赴糧道方足以資開發故漕船開出之  
後州縣逋累不少而未征之糧串正多惟期陸



續征還始能歸墊而民間則以漕船已去延宕無妨設遇歲功不齊更必藉詞抗欠乃未幾而奏銷須截數矣未幾而上忙又頂限矣新錢糧與舊漕尾勢難同時並催一輾轉閒而上屆之漕尾未清下屆之新漕又至不得不先其所急舍舊圖新年復一年遂成交代抵款此等墊漕之州縣雖非正辦而其心究屬急公較諸坐視悞漕者奚啻霄壤設或禁其墊辦必致貽悞兌開歷年以來惟有於辦理新漕之餘責令設法

帶催舊欠使之遞年減少漸就清釐故自嘉慶二十三年起至道光十年止已閱十餘載之久中間征辦漕白正耗行月兵匠等米不下三千萬石而僅留此三十餘萬之尾欠是催徵未敢鬆懈似可概見卽其墊解錢糧銀兩亦皆迫於供支之急不得不然今若免於民而賠於官如咨追原墊之員既恐人亡產絕如責令現任彌補尤恐剜肉補瘡甚且藉詞賠累削民膏卽使參劾嚴懲亦已無裨於事矣幸蒙

聖主洞察下情

恩綸普被臣等不揣冒昧謹將實在情形合詞附片

縷陳伏乞

聖鑒訓示謹

奏

驗收寶山縣海塘工程摺

奏為捐修寶山縣海塘先將已完土石各要工驗明如式仍飭妥速集捐趕添椿石永資鞏固並將四千兩以上至萬餘兩之捐戶先行懇

恩獎勵以昭激勸仰祈

聖鑒事竊照太倉州屬之寶山縣海塘於七年六月間連遇風潮異常猛烈沖坍至五千餘丈經臣與督臣陶澍函商以海濱保障攸關斷不可遷延貽悞而工程浩大

國家經費有常又值浙省大修海塘之時不敢復以江蘇塘工請動

帑項當飭升任藩司陳鑾親赴寶山會同蘇松太道陽金城體訪輿情妥爲勸諭捐輸辦理由臣附片具奏欽遵

硃批所辦妥等因欽此隨即率同司道州縣捐廉爲倡勸諭城鄉紳庶陸續出捐十萬有零因估需工費在二十萬兩以外復於附近之嘉定上海二縣互勸集捐以襄鉅役一面督飭印委各員

選舉董事乘時興工會同督臣陶澍奏奉

諭旨責成蘇松太道陽金城太倉州知州李正鼎督同各該縣隨捐隨辦等因欽此當卽恭錄轉行欽遵辦理旋據該州縣等以該塘有逼近海濱外無護灘之處應否繞越挽築稟請臣臨工勘辦又嘉定上海二縣協捐亦須臣親往督勸臣當於上年十月內赴工親勘定議並將勸捐踴躍情形續經附片陳明在案伏查該塘舊工因收分過少形勢近於陡直恐不足以柔潮勢是以

現築新塘概係底寬八丈頂寬二丈高一丈二尺外面臨水之處均用三收做法裏面亦用二收並恐舊土與新土不相膠黏所有沖壞之處悉將舊土剷平鋪底重新礮築每鬆土一尺行礮三遍打成實土六寸責令各段委員逐層面驗驗實一層方許加築一層又石塘鋪砌條石一百九十餘丈皆令選擇堅結石料鑿鑿平整其土石交接之處加築石埧三層以資裹護並於小沙背談家浜二處收復挑水埧兩道埧外

雙椿夾石以資挑溜又沿塘簽釘排椿填砌塊石凡迎潮頂沖之處皆用雙層其次要之處酌用單層又施港迤南舊有石洞一座係農民灌溉所需不宜堵塞而大汛潮猛易被沖決原估挽越砌築嗣察看形勢竟須改建石閘一座始足吐納潮汐農田既資霑潤而閘身寬厚亦無激蕩之虞又塘後舊有隨塘河一道工長五千二百餘丈歲久湮塞幾成平陸該河本關水利且沿塘椿石得由內河運送可免海運風濤之



險自宜乘此興舉鉅工之時一律開濬以上各  
工有原估所未備及者節據太倉州知州李正  
鼎統辦委員候補知縣龔潤森總催委員坐補  
崇明縣知縣徐家槐鎮洋縣知縣孔昭顯暨寶  
山縣知縣毛正坦等稟由司道核明詳請添辦  
當經批飭督率紳董覈實經理計自上年九月  
二十一日開工起截至本年五月內除石塘先  
經補砌完竣外所有新築土塘工長五千二百  
餘丈均已告竣其石塘南北兩頭與土塘交接

之處三層盤頭石堤一律砌就挑濬隨塘河亦  
已完竣通工椿石先將頂沖之處擇要釘砌其  
餘尙須集捐購料陸續接辦據各該員將已竣  
各工稟請先行驗收臣於五月十九日出蘇州  
前赴寶山周歷查驗所有江西江東各土塘量  
明高寬丈尺較原估格外敷餘逐段錐試均屬  
十分飽滿礮築實爲認真補砌石塘回面方整  
並用鐵錫鐵錠逐層勻貫新舊相合灰漿堅結  
盤頭石堤三層排椿緊密填砌塊石高與土石

塘相平塘外單雙各石埧擇險釘砌之處椿密石厚足資護塘挑溜其隨塘河道挑深九尺至一丈不等正屆插秧之際塘內數萬農田咸資灌溉施港口石閘業經砌至十三層工已及半砌法與石埧塘相同甚爲堅整臣連日查看工段紳士耆民扶老攜幼香花載道無不歡忻鼓舞感頌

皇仁就中有年近百歲及九十歲之耆民王七大陸孔彰楊世奇等僉稱曾經四見大修海塘未有

如此次之層土層礮高寬堅固者臣驗工之時  
適見伏汛潮汐正屬盛旺塘工大局告竣已覺  
捍禦堪資再得通工樁石全完定足以垂久遠  
惟應行續購各料尙屬不少而江西海口礮臺  
攸關設險亦須拆修尙有

天后宮及

海神廟年久坍塌並應改建所需經費本係奏奉  
諭旨隨捐隨辦除官捐項下升任藩司陳鑾捐銀三  
千兩解任蘇松太道陽金城捐銀三千兩護理

蘇松太道蘇州府知府汪忠增捐銀三千兩太  
倉州知州李正鼎捐銀三千兩寶山縣知縣毛  
正坦捐銀六千兩署上海縣事元和縣知縣黃  
冕捐銀三千兩署嘉定縣知縣王錫九捐銀一  
千五百兩均已交齊支用外其紳庶各捐戶內  
有捐數在四千兩以上至萬餘兩者似應先懇  
恩獎俾共聞風鼓舞互相激勸已捐者趕緊湊繳未  
捐者倍加輸將庶大工剋期告成以仰副我

皇上保衛海疆登民衽席至意據署蘇州藩司裕謙

具詳前來謹另繕清單恭呈

御覽伏候

欽定至印委各員辦事日久冒暑衝寒皆能實力實  
心不辭勞瘁應俟大工全竣歷過秋汛風潮再  
行奏懇

恩施以昭核實所有現在驗收已完塘工並籌畫趕  
辦情形臣謹會同兩江總督臣陶澍恭摺具

奏伏乞

皇上聖鑒訓示謹

奏

驗收蘇松太等處水利摺

奏爲蘇松太三府州陸續挑辦各河道均已告成  
驗收如式恭摺奏祈

聖鑒事竊維江蘇漕賦出自水田水治則田資其利  
不治則田被其害仰荷

聖明洞鑒疊蒙

諭旨飭修近年以來水利農田頗收實效如十四年  
秋閒之發蛟十五年夏閒之亢旱幸賴吳淞劉  
河白茆等處挑浚寬深蓄洩得力故皆不致成



裁此尤效之顯著者是以官紳士庶倍知加意  
講求臣於上年驗收太倉之楊林河吳江之瓜  
涇港兩處將劉河案內節省餘銀量爲分撥仍  
令自行湊辦外其餘概由官民籌捐辦理當經  
會同督臣陶澍奏蒙

諭旨允行在案自上年至今各屬續挑河道除零星  
汊港不計外其在蘇州府屬則吳江縣之瓜涇  
港王家匯姚家莊七里港邨前嘴大港新港各  
河統共工長一千五百六十七丈常熟昭文二

縣之福山塘河下通海口工長四千九百八十  
八丈零其附近之竺塘涇景市橋河共長三千  
四百丈並添建攔潮石閘一座又吳縣之張家  
塘香山港王家橋河統共工長二千二百三十  
六丈其在松江府屬則上海縣之蒲匯塘肇家  
浜兩河共長八千五百七十五丈又李從涇新  
涇薛家浜三河共長四千八百六十一丈各河  
挑竣之後於接連黃浦之龍華日赤二港各留  
大埧一座以截渾潮又修復南門外石閘以時

啓閉並將該縣城河一體疏通又川沙廳之白  
蓮涇長浜呂家浜小腰浜四河與上海南匯並  
界共長六千五百二十四丈零又華亭縣之亭  
林鎮鶴頭匯大小運港共長三千餘丈又婁縣  
之古浦塘官紹塘等河共長三千六百六十六  
丈又金山縣先挑洙涇鎮互迎港周家埭邵家  
塘等河共長十五里續挑腰涇河干巷鎮陸巷  
港歸涇河老鴨涇朱泥涇各河共長四十五里  
又青浦縣泖湖切灘與元和婁縣並界共長二

千九百六十五丈零其在太倉州屬則太鎮兩境之楊林河工長四千九百四十七丈又州境之錢涇瑤塘又鎮洋縣境之朱涇南北澹漕石婆蕭塘西南十八港六窰塘大凌門等河統共工長二萬四百九丈零又嘉定縣先挑之華亭涇蒲華塘黃姑塘共長六千七百四十九丈續挑之南北雙塘吉涇心涇川路涇橫塘練祈塘等河連內外城濠共長九千四百六十九丈以上各工界連十五廳州縣合計挑竣土方共一

百六十六萬七千四百餘方茲已陸續據報挑

竣

臣

於驗收海塘工程之便凡可以經由處所

俱經親歷該河量驗口底寬深並將現存水勢

逐竿測量按段標記其未能經由之處遞委司

府分往驗收均據稟覆寬深如式其中尤以上

海之蒲匯塘等五河常昭之福山塘河川沙之

白蓮涇等四河太鎮之楊林各河挑挖倍見深

通水勢極形暢順

臣

舟輿所歷親見遍地禾棉

皆已長發彌望青蔥耰耨穰穰之民皞皞熙熙

共冀歲登大有較前此數年景象迥乎不侔胥  
由

聖澤之淵涵下普斯民之樂利臣職司疆土感凜彌  
深除借款之瓜涇港楊林河應飭按例造冊報  
銷外其餘捐辦之工自應遵照歷奉

諭旨免其造報至楊林河工長幾及五千丈估至十  
七萬餘方前經酌借銀八千兩不敷尚多概係  
勸捐湊辦應與瓜涇港不敷之項均准其核實  
開明此外各工多由地方官首先捐廉爲之倡

導紳庶人等或量力捐輸或業食佃力均賴衆  
擎易舉適觀厥成所有大小各捐戶已分飭查  
取確數由司核明按照定例分別詳請

奏咨至倡捐勸導暨在工出力之印委各員固係  
分所應盡惟工段長而經費鉅其中設法籌辦  
若非殫心竭力累月經營亦恐未易集事如蒙  
皇上天恩念其著有微勞

准予獎勵

臣

當與督

臣

陶澍擇其尤爲出力者另行

會摺奏懇

恩施不敢稍任冒濫除將現浚河道丈尺彙開清單

恭呈

御覽外所有驗收挑工緣由謹會同督臣陶澍合詞

恭摺具

奏伏乞

皇上聖鑒謹

奏



通州捐挑河道片

再江甯藩司所屬之通州地方瀕江控海負郭  
卽爲高阜近沙皆屬低區因潮汐往來沙港漸  
成淤墊圩岸闢壩亦多年久傾頽旱澇每虞無  
備飭據前任通州升任貴州遵義府知府平翰  
督率委員紳董勸諭捐修當經

奏明責令該員一手經理旋據稟報將通江引潮  
之姚港等二十七港照業食佃力之例開挑深  
通共出土五十六萬二千四百餘方又白蒲鎮

六十里河道半屬淺塞未能納潮內近田之三十里亦照業食佃力挑辦其最淺之七處計長三十里係平翰首先捐廉勸諭紳董捐挑一律挑深三尺卽以挑出之士加倍圩岸又修復唐家閘鹽倉壩正閘耳閘以爲蓄洩關鍵並以工餘之項修理該州試院統共用銀一萬八十八兩零均由官紳籌捐興辦次第完工並將捐數用數榜示曉諭又各鄉董事或開挑柴兩沙界河加築圩岸或修築餘中頭橋至四甲壩十餘

里河岸或開挑六堰濬民灶沙雙鼻子港及紫  
琅書院公田旁通各河道或改建西三十里鎮  
之翔鳳橋亦俱一律告成不在捐數之內經委  
常鎮道前往逐一驗收工程悉皆如式實於地  
方有裨除升任知州平翰自行稟明不敢仰邀  
議敘外其餘捐輸出力官紳飭司查明照例請  
獎俟詳到再行彙辦合併附片具

奏伏乞

聖鑒謹

奏

覆奏稽查防範回空糧船摺

奏爲回空糧船漸次行抵江境遵

旨飭屬稽查防範恭摺覆

奏事竊

臣

承准軍機大臣字寄欽奉

上諭糧船水手人等類皆無業游民獷悍性成愍不畏法漕河及地方文武員弁如果認真稽察遇案卽辦有犯必懲該水手人等自必聞風斂迹乃本年甫經議定章程之後屢有起獲器械及水手滋事之案此時重運經過地方沿河文武員弁節節

催提嚴密彈壓水手人等尙知斂迹日後卸運回  
空稽查稍懈更恐不肖之徒逞兇玩法尤應先事  
豫防漕運總督約束水手是其專責其漕船經過  
地方各督撫亦屬責無旁貸者不分畛域一體通  
飭所屬於漕船回空加意稽查小心防範毋稍鬆  
懈倘稍涉寬縱或至別釀事端惟該督撫等是問  
將此各諭知之欽此遵查南漕約計一百幫其船  
數在四千左右無一不由江南經過而渡黃渡  
江灌注催提尤貴機宜悉協是以江南文武無

不以漕事爲兢兢加以水手獷悍性成無惡不作近年來其風愈熾惟有嚴拏懲辦庶可斂戢

兇頑前臣等議立章程仰荷

聖明勅部覆准辦理計本年滋事之水手已經拏獲者如王七韓老閻大漢丁朋鈴等俱問擬斬梟

恭請

王命先行正法劉汝罄王老劉洸太汪詠順張四高蘇城等俱問擬斬決王富貴問擬絞決徐得生張興名吳俊彭瑞安張富倉吳啓等俱問擬外

道徐贊龍錢占元繆永幅倪啟祥等俱問擬充  
軍張殿奎王桂戴忠林陳兆奎李繼泰張德山  
吳朝雲侯二辭瓏康侯深義張永林永祥吳金  
貴胡鼎義王太富等問擬流徒又拏獲疊次搶  
劫之夏明輝段添喜戴泳發及馬九小沙四馬  
炳源張萬發楊開泰沈二卽小朱子徐小趙跪  
兒李成信卽李老李洮華陳八劉三李萬春孫  
大肚孫四王三朱老等二十犯亦已審訊得實  
卽儘法分別懲辦以故本年糧船自水次開行



以及渡江渡黃凡在江南境上較之往年頗覺  
安靜惟自東省開河以及北壩水路尤長人數  
既多難保別無滋事如一船之中在冊水手以  
十名爲率合全漕而計卽不下四萬人此外游  
幫之短絳短檣在岸隨行覓食者更不啻倍蓰  
所謂青皮散風之類亦卽雜處其間難以數計  
且回空比之重運更易滋生事端一則帶回棗  
梨等貨分合售賣計少爭多再則豫攬次年出  
運之頭篙頭絳如不遂意卽相殘殺謂之爭窩

若遇徒陽水淺江面多行數里則又加索旗丁  
腳費別立名目曰性命錢不特此也積仇之幫  
每相遇則不相下重運開行時尙有別幫阻隔  
若回空則此幫泊船之水次卽彼幫過路所經  
由糾約復仇多在此際臣於近數年來均將到  
次在前之鎮江前後兩幫

奏明先泊江邊鮎魚套俟浙船過完再令歸次以  
免互擠生事此次仍當循案辦理其自宿遷入  
境以至黃河北岸之楊莊已派參遊都守帶兵

四隊分駐催提自南岸至清江迤下之平河橋  
又駐四隊淮城高寶以至揚州酌駐三隊揚州  
城外分設南北兩廳搜鹽償放派員較多及出  
瓜洲則一路由長江西上一路入京口南行又  
皆逐段分駐文武委員與府縣營汛相爲犄角  
如此星羅碁布似足以敷彈壓而免空虛如有  
水手滋事會合兜擄聲勢亦皆聯絡仍將新定  
嚴辦章程刊刷簡明告示委員齎往前途按船  
實貼俾相觸目警心至水手私帶器械原貴搜

查然不敢謂一搜之後便無餘贖卽如著名強悍之鎮江前後兩幫前歲回空經臣親駐鎮江於其進口時逐船搜獲大小刀械不下數百件曾經奏蒙

聖鑒而此後續經購製者仍難保其必無竊謂搜查器械若預定其時其地則若輩先有準備無難寄頓隱藏迨時過境遷仍不免礪其鋒刃現擬剴切示諭以軍船無論何處停泊皆准該處文武會合搜查一經搜出卽照新例重辦則無一

定之時地而有一定之刑章凡在催償之員皆有搜查之責匿之不勝其匿購之亦不勝其購其勢卽不敢停留旣不停泊卽無滋事此亦理之相因而見者也總之水手之逞強在於恃衆而官員之畏葸實恐悞漕今自嚴定新章以來果皆有犯必懲有懲必重當未有不畏法紀者現據稟報入江南境之船約有二十餘幫臣已函商河臣麟慶相度機宜早籌灌放一得啓闕之期臣卽赴清江督催償渡務期迅速南下安

靜小心以仰副

聖主諳諳詰誠至意所有稽查防範緣由

臣

謹會同

護撫

臣

怡良合詞恭摺具

奏伏乞

皇上聖鑒謹

奏

鹽城豐縣兩處借項修築河堤摺

奏爲鹽城豐縣兩處河道堤工勘明淤墊殘缺循  
案借項挑築分年攤徵還款恭摺奏祈

聖鑒事竊照淮安府屬鹽城縣境內皮大河一道卽  
皮岔河上承高郵寶應興化泰州諸河蕩之水  
下注天妃閘歸新洋港入海爲淮揚兩屬自西  
至東洩水歸海要道因年久失浚河身淤高間  
成平陸遇水則不能暢洩逢旱則灌溉無資又  
徐州府屬豐縣順堤河一道上接山東單縣交

界起至沛縣交界止向係宣洩條河兩岸上下數百里民田之水歸入昭陽湖濟運又該河迤北有太行堤一道係保障順堤河要工因嘉慶年間豐汛六堡黃水漫溢河身間段汙墊堤上漸形卑矮並多冲成缺口不能攔禦每逢夏秋大雨時行河水漲發由太行堤各缺口橫流北往漫淹堤北遠近民田以致連遭災歉歷年以來節據各該縣士民紛紛呈請借項挑築屢經批飭從緩近來河淤堤缺較前更甚經藩司先



後委員分詣該處逐一履勘復由道府覆勘委  
係必不可緩之工查鹽城縣皮大河計長七千  
八十六丈按段之高下一律配平河底共估挑  
土二十五萬一千三百三十六方四分一釐每  
方連戽水工實需銀一錢九分並工頭工尾及  
兩旁港汊分別酌估椿填土填查照海防廳漕  
規例價統共確估銀四萬八千三百九十三兩  
一錢三分八釐一毫豐縣順堤河挑土六萬零  
三百一十一方乾淤不一每方價銀三錢及二

錢七分二釐一錢六分不等合銀一萬二千二百六十八兩八錢八分又太行堤一道估土十萬二千二百七十方九分八釐每分價銀一錢二分五釐合銀一萬二千七百八十三兩八錢七分二釐五毫二共確估銀二萬五千五十二兩七錢五分二釐五毫造冊具結詳由府道遞減無浮該兩縣均係屢歉之區民力實在拮据不能自行捐辦循照成案借項挑築分年攤徵還款由江甯布政使湯簧詳請具

奏前來臣等伏查道光七年間御史錢儀吉條奏

河湖漕運情形案內欽奉

諭旨飭委委員將興化鹽城等州縣湖蕩詳細履勘  
應如何興築疏導及早興辦總期一律深通方有  
裨益等因欽此當經前督臣蔣 欽遵行司委

勘卽據府縣印委各員以鹽城縣皮大河淤墊  
勘估應挑維時或因春水方生或因堪水下注  
是以延未興辦其豐縣順堤河大行堤工程亦  
於道光九年經前督臣等彙同徐屬河堤等工

酌議動支開河經費銀兩次第請辦奏奉

諭旨允准嗣因開河經費一款不敷動撥是以暫緩

今據先後勘明實係河淤堤缺頻年被災挑築  
各工刻不可緩經督臣陶澍批准辦理尙未具

奏現在水勢已落自應乘時趕緊挑辦以資蓄洩  
而衛田廬所有鹽城縣土方夫工銀四萬八千  
三百九十三兩一錢三分八釐一毫豐縣土方  
夫工銀二萬五千五十二兩七錢五分二釐五  
毫均已核實無浮合無仰懇

聖恩俯准予司庫蘆課襍稅漕價等款銀內照數借給責令各該縣分別督董乘此農功事畢趕緊集夫挑築工竣委員核實驗收實於水利民生均有裨益至所借銀兩請從道光十七年起鹽城分作五年豐縣分作六年各於受益民田攤徵還款除飭取攤徵估計各冊另行詳

題外謹會同江南河道總督臣麟慶合詞恭摺具奏伏乞

皇上聖鑒訓示謹

奏

各屬民欠攤徵借辦工程銀兩請豁摺

奏爲遵

旨查明江蘇省各屬借辦工程攤征未完民欠銀數

開單恭

奏仰祈

聖鑒事切照欽奉

恩旨普免道光十年以前民欠錢糧一案業經

臣林

則徐於巡撫任內查明江蘇省民欠地漕等項

確數會摺具

奏並聲明應免雜款及攤徵河銀查照上屆成案  
另行分別具奏在案伏查江淮揚徐海五府州  
及蘇松常州等府所屬境內道光十年以前疏  
浚水利河道修築堤堰應歸民辦工程因工鉅  
費繁先後

奏准借帑給辦分年攤徵本應清完還款惟江淮  
等屬濱臨湖河多係積款之區仰蒙我

皇上軫念民依遇裁蠲緩正款既經緩帶借款亦卽  
展攤往往前限未及徵完後借分攤踵至是以



限內雖有輸納而節年積欠仍多至蘇松常州等府亦自道光三年水裁之後民力拮据遞年展緩尙有未完帶款溯查嘉慶二十四年豁免積欠案內江省河堰各工借款攤徵未完民欠先經前督臣孫等奏奉

**恩旨**豁免嗣于道光二年間因江安兩省徐鳳泗三府州屬裁傷屢告又經體察情形請照乾隆六十年豁免定案除借款在嘉慶二十四年以後者仍按限分徵外其在二十三年以前借款攤徵

未完銀兩續經

奏准部議奉

旨概行豁免在案此次仰蒙

恩旨查豁各款民欠錢糧係以道光十年爲止先據  
各藩司具詳道光十年以前積欠攤徵並借項  
在道光十年以前而攤徵在十年以後者各屬  
均係濱臨江海湖河裁傷屢告查與上屆嘉慶  
二十四年及道光二年兩次豁免成案相符詳  
請援案一體查辦隨經 臣等飭據該司等將各

屬挑築河堤等工借款攤徵銀兩造具已未完  
清冊送由該管道府州調齊徵簿串根按年按  
款徹底盤查結轉再申藩司悉心綜核據實開  
報不任稍有隱混茲據江甯布政使楊簧前署  
蘇州布政使裕謙將實欠在民未完確數開單  
詳請具

奏前來

臣

等覆加查核江甯淮安揚州徐州海州

五府州屬截至道光十年止應征還銀一百二  
十三萬七千六百六十兩五分八釐四毫除已

完解司並報入三次清查參案虧缺及完存屬  
庫未解共銀四十三萬七千六百五十一兩八  
錢八分九釐統計實在民欠及因緩帶未完並  
未屆徵限共銀八十萬八兩一錢六分九釐四  
毫蘇州松江常州三府屬除孟瀆河續借挑河  
建閘等銀八萬六千七百二十四兩六錢五分  
二釐借領在十年以後仍應照案攤徵外截至  
道光十年止實在民欠並裁緩未完及未屆徵  
限共銀二十萬六千九百三兩九錢二分二釐

以上江蘇兩屬共民欠未完銀一百萬六千九百一十二兩九錢一釐四毫均係道光十年前借項領辦之工實欠在民並無隱混恭逢

皇上鴻恩浩蕩

惠普寰區合無仰懇

聖慈俯准一體寬免此內雖有未屆徵限而借款領辦係在十年以前者請援歷辦成案一律蠲除俾濱臨河湖億兆窮黎咸霑實惠感沐

鴻施益無既極除將送到清冊咨部查核外臣等謹

合詞恭摺具

奏並繕清單敬呈

御覽伏乞

皇上聖鑒謹

奏

漕費禁給洋錢摺

奏爲江省洋錢價值浮於紋銀現屆辦理新漕請  
禁折給洋錢以速漕務而平市價恭摺奏祈  
聖鑒事竊惟財用之道利通於下而權操自上

國家理財制用以紋銀與制錢並行本不許畸輕  
畸重從前洋錢流入內地其成色比紋銀爲低  
其價值原比紋銀爲賤因小民計圖便利日漸  
通行未幾而洋銀等於紋銀又未幾而洋價浮  
於銀價道光十三年間給事中孫蘭枝奏奉

旨飭令體察情形悉心籌議惟時江省每洋銀一圓作曹平紋銀七錢三分雖成色遠遜足紋而分兩尙無軒輕民間行使已久若驟爲禁止轉恐窒礙難行當經臣林則徐與督臣陶澍酌議予以限制奏奉

上諭洋錢行用內地既非始自近年勢難驟禁要當於聽從民便之中示以限制其價值一以紋銀爲準不得浮於紋銀庶不致愈行愈廣等因欽此欽遵通行各屬出示曉諭在案當奉行之始洋錢



時價合紋銀七錢一二三分不等官民商旅均屬相安迨日久玩生閭閻閒輾轉高擡幾有不可遏抑之勢近日蘇松一帶洋錢每圓概換至曹紋八錢一二分以上較比三四年前每圓價值實已擡高一錢卽兌換制錢亦比紋銀多至一百文以外查蘇州工商輻輳洋錢行使最多每圓加價一錢十圓卽加一兩以一百萬圓而計卽已潛耗紋銀十萬兩平民一切用度卽明爲照舊者暗中皆已加增若論拔本塞源理應

將洋錢全行禁用方爲正辦然習俗狃於便安勢不能驟然阻止卽使嚴申令甲亦恐陽奉陰違若紛紛派委稽查尤慮藉端滋擾惟當於行用最爲多之處先截其流使奸僧無可居奇庶洋價因而平減查蘇省冬春之際漕船自歸次修船以至兌足開行用度不少旗丁與州縣交涉之處雖事屬瑣屑未敢上陳而實於漕行之遲速大有關係通省辦漕之州縣或用紋銀或用錢文各有相沿舊制惟蘇松等屬每有以洋錢

折給之事在從前原圖便易迨取數多而需用  
急則市中洋價愈昂且南方所用之洋錢一經  
渡黃又不適於北方之用是以幫船開行仍須  
換銀帶往彼鋪戶利權子母計析錙銖往往於  
糧船受兌之前先將洋價擡高以困州縣及至  
幫船開行之日又將銀價擡高以困旗丁輾轉  
低昂陰爲盤剝以致縣幫交累漕務愈難况洋  
錢作價既多則縣幫每多爭執既有爭執勢必  
耽延重運開行之遲未始不由于此臣等公同

籌議欲杜洋錢之擡價絕市僧之居奇必先於  
辦漕禁用洋錢方可以回積習現在空船歸次  
期於早兌早開相應請

旨將漕務內一切費用概禁折給洋錢其向需洋錢  
一圓者今悉以紋銀七錢三分核實給發庶市  
僧免高擡之價縣幫無爭較之煩不獨圍法得  
以均平卽漕行亦因以迅速似屬於公有裨如  
丁胥夫役人等膽敢抗違或市僧奸商把持壟  
斷卽由臣等一體嚴拏從重究辦不稍寬貸務

期令行禁止弊絕風清以仰副

聖主利民速漕之至意

臣

等謹合詞恭摺具

奏是否有當伏乞

皇上聖鑒訓示謹

奏